

摘藻堂四庫全書薈要

史部

欽定四庫全書薈要

史部

舊唐書卷四十八

詳校官內閣侍讀臣孫球



欽定四庫全書薈要卷四千九百六十四

史部

舊唐書卷四十八

後晉司空同中書門下平章事劉 昫撰

食貨志二十八

食貨上

先王之制度地以居人均其沃瘠差其貢賦蓋斂之必
以道也量入而為出節用而愛人度財省費蓋用之必
有度也是故既庶且富而教化行焉周有井田之制秦

有阡陌之法二世發閭左而海內崩離漢武稅舟車而國用以竭自古有國有家興亡盛衰未嘗不由此也隋文帝因周氏平齊之後府庫充實庶事節儉未嘗虛費開皇之初議者以比漢代文景有粟陳貫朽之積煬帝即位大縱奢靡加以東西行幸輿駕不息征討四夷兵車屢動西失律於沙徼東喪師於遼碣數年之間公私罄竭財力既殫國遂亡矣高祖發跡太原因晉陽宮留守庫物以供軍用既平京城先封府庫賞賜給用皆有

節制徵斂賦役務在寬簡未及踰年遂成帝業其後掌財賦者世有人焉開元已前事歸尚書省開元已後權移他官由是有轉運使租庸使鹽鐵使度支鹽鐵轉運使常平鑄錢鹽鐵使租庸青苗使水陸運鹽鐵租庸使兩稅使隨事立名沿革不一設官分職選賢任能得其人則有益於國家非其才則貽患於黎庶此又不可不知也如裴耀卿劉晏李巽數君子便時利物富國安民足為世法者也開元中有御史宇文融獻策括籍外剩

田色役偽濫及逃戶許歸首免五年征賦每丁量稅一
千五百錢置攝御史分路檢括隱審得戶八十餘萬田
亦稱是得錢數百萬貫玄宗以為能數年間拔為御史
中丞戶部侍郎融又畫策開河北王莽河漑田數千頃
以營稻田事未果而融敗時又楊崇禮為太府卿清嚴
善勾剝分寸錙銖躬親不厭轉輸納欠折估漬損必令
徵送天下州縣徵財帛四時不止及老病致仕以其子
慎矜為御史專知太府出納其弟慎名又專知京倉皆

以苛刻害人承主恩而徵責又有韋堅規宇文融楊慎
矜之跡乃請於江淮轉運租米取州縣義倉粟轉市輕
貨差富戶押船若遲留損壞皆徵船戶關中漕渠鑿廣
運潭以挽山東之粟歲四百萬石帝以為能又至貴盛
又王鉷進計奮身自為戶口色役使徵剝財貨每歲進
錢百億寶貨稱是云非正額租庸便入百寶大盈庫以
供人主宴私賞賜之用玄宗日益眷之數年間亦為御
史大夫京兆尹帶二十餘使又揚國忠藉椒房之勢承

恩幸帶四十餘使云經其聽覽必數倍弘益又見寵貴
太平既久天下至安人不願亂而此數人設詭計以侵
擾之凡二十五人同為剝喪而人無敢言之者及安祿
山反於范陽兩京倉庫盈溢而不可名揚國忠設計稱
不可耗正庫之物乃使御史崔衆於河東納錢度僧尼
道士旬日間得錢百萬玄宗幸巴蜀鄭昉使劍南請於
江陵稅鹽麻以資國官置吏以督之肅宗建號於靈武
後用雲間鄭叔清為御史於江淮間豪族富商率貸及

賣官爵以裨國用德宗朝討河朔及李希烈物力耗竭
趙贊司國計纖瑣刻剝以為國用不足宜賦取於下以
資軍蓄與諫官陳京等更陳計策贊請稅京師居人屋
宅據其間架差等計入陳京又請籍列肆商賈資產以
分數借之宰相同為欺罔遂行其計中外沸騰人懷怨
望時又配王公已下及嘗在方鎮之家出家僮及馬以
助征行公私囂然矣後又張滂裴延齡王涯等剝下媚
上此皆足為世戒者也先是興元克復京師後府藏盡

虛諸道初有進奉以資經費復時有宣索其後諸賊既
平朝廷無事常賦之外進奉不息韋臯劔南有日進李
兼江西有月進杜亞揚州劉贇宣州王緯李錡浙西皆
競為進奉以固恩澤貢入之奏皆曰臣於正稅外方圓
亦曰羨餘節度使或託言密旨乘此盜貿官物諸道有
謫罰官吏入其財者刻祿廩通津達道者稅之蒔蔬藝
果者稅之死亡者稅之節度觀察交代或先期稅入以
為進奉然十獻其二三耳其餘沒入不可勝紀此節度

使進奉也其後裴肅為常州刺史乃鬻貨薪炭按牘百
賈之上皆規利焉歲餘又進奉無幾遷浙東觀察使天
下刺史進奉自肅始也劉贇死於宣州嚴綬為判官傾
軍府資用進奉無幾拜刑部員外郎天下判官進奉自
綬始也習以為常流宕忘返大抵有唐之御天下也有
兩稅焉有鹽鐵焉有漕運焉有倉廩焉有雜稅焉今考
其本末叙其否臧以為食貨志云武德七年始定律令
以度田之制五尺為步步二百四十為畝畝百為頃丁

男中男給一頃篤疾廢疾給四十畝寡妻妾三十畝若當戶者加二十畝所授之田十分之二為世業八為口分世業之田身死則承戶者便授之口分則收入官更以給人賦役之法每丁歲入租粟二石調則隨鄉土所產綾絹純各二丈布加五分之一輸綾絹純者兼調綿三兩輸布者麻三斤凡丁歲役二旬若不役則收其傭每日絹三尺有事而加役者二旬有五日後免其調三旬則租調俱免通正役並不過五十日若嶺南諸州則稅米上

戶一石二斗次戶八斗下戶六斗若夷獠之戶皆從半
輸蕃胡內附者上戶丁稅錢十文次戶五文下戶免之
附經二年者上戶丁輸羊二口次戶一口下三戶共一
口凡水旱蟲霜為災十分損四已上免租損六已上免
調損七已上課役俱免凡天下人戶量其資產定為九
等每三年縣司注定州司覆之百戶為里五里為鄉四
家為鄰五家為保在邑居者為坊在田野者為村村坊
鄰里遞相督察士農工商四人各業食祿之家不得與

下人爭利工商雜類不得預於士伍男女始生者為黃
四歲為小十六為中二十一為丁六十為老每歲一造
計帳三年一造戶籍州縣留五比尚書省留三比神龍
元年韋庶人為皇后務欲求媚於人上表請以二十二
為丁五十八為老制從之及韋氏誅復舊至天寶三載
又降優制以十八為中男二十二為丁天下籍始造四
本京師及東京尚書省戶部各貯一本以備車駕行幸
省於載運之費焉凡權衡度量之制度以北方秬黍中

者一黍之廣為分十分為寸十寸為尺十尺為丈量以
秬黍中者容一千二百為龠二龠為合十合為升十升
為斗三升為大升三斗為大斗十斗為斛權衡以秬
黍中者百黍之重為銖二十四銖為兩三兩為大兩十
六兩為斤調鍾律測晷景合湯藥及冠冕制用小升小
兩自餘公私用大升大兩又山東諸州以一尺二寸為
大尺人間行用之其量制公私又不用龠合內之分則
有抄撮之細天寶九載二月勅車軸長七尺二寸麴三

斤四兩鹽斗量除陌錢每貫二十文先是開元八年正月勅頃者以庸調無憑好惡須準故遣作樣以頒諸州令其好不得過精惡不得至濫任土作貢防源斯在而諸州送物作巧生端苟欲副於斤兩遂則加其丈尺至有五丈為疋者理甚不然濶一尺八寸長四丈同文共軌其事久行立樣之時亦載此數若求兩而加尺甚暮四而朝三宜令所司簡閱有踰於比年常例丈尺過多奏聞二十二年五月勅定戶口之時百姓非商戶郭外

居宅及每丁一牛不得將入貨財數其雜匠及幕士并
諸色同類有蕃役合免征行者一戶之內四丁已上任
此色役不得過兩人三丁已上不得過一人其年七月
十八日勅自今已後京兆府關內諸州應徵庸調及資
課並限十月三十日畢至天寶三載二月二十五日赦
文每載庸調八月徵以農功未畢恐難濟辦自今已後
延至九月三十日為限二十五年三月勅關輔庸調所
稅非少既寡蠶桑皆資菽粟常賤糶貴買捐費逾深又

江淮等苦變造之勞河洛增轉輸之弊每計其運脚數倍加錢今歲屬和平庶物穰賤南畝有十千之獲京師同水火之饒均其餘以減遠費順其便使農無傷自今已後關內諸州庸調資課並宜準時價變粟取米送至京逐要支用其路遠處不可運送者宜所在收貯便充隨近軍糧其河南河北有不通水利宜折租造絹以代關中調課所司仍明為條件稱朕意焉天寶元年正月一日赦文如聞百姓之內有戶高丁多苟為規避父母

見在乃別籍異居宜令州縣勘會其一家之中有十丁已上者放兩丁征行賦役五丁已上放一丁即令同籍共居以敦風教其侍丁孝假免差科廣德元年七月詔一戶之中三丁放一丁庸調地稅依舊每畝稅二升天下男子宜二十三成丁五十八為老永泰元年五月京兆麥大稔京兆尹第五琦奏請每十畝官稅一畝效古什一之稅從之二年五月諸道稅地錢使殿中侍御史韋光裔等自諸道使還得錢四百九十萬貫乾元以來

屬天下用兵京師百寮俸錢減耗上即位推恩庶寮下

議公卿或以稅畝有苗者公私咸濟乃分遣憲官稅天

下地青苗錢以充百司課料至是仍以御史大夫為稅

地錢物使歲以為常均給百官大歷四年正月十八日

勅有司定天下百姓及王公已下每年稅錢分為九等

上上戶四千文上中戶三千五百文上下戶三千文中

上戶二千五百文中中戶二千文中下戶一千五百文

下上戶一千文下中戶七百文下下戶五百文其見官

一品準上上戶九品準下下戶餘品并準依此戶等稅
若一戶數處任官亦每處依品納稅其內外官仍據正
員及占額內闕者稅其試及同正員文武官不在稅限
其百姓有邸店行鋪及鑪冶應準式合加本戶二等稅
者依此稅數勘責徵納其寄莊戶準舊例從八等戶稅
寄住戶從九等戶稅比類百姓事恐不均宜各遞加一
等稅其諸色浮客及權時寄住田等無問有官無官各
所在為兩等收稅稍殷者準八等戶餘準九等戶如數

處有莊田亦每處稅諸道將士莊田既緣防禦勤勞不可同百姓例並一切從九等輸稅其年十二月勅令闕輔墾田漸廣江淮轉漕常加計一年之儲有太半之助其於稅地固可從輕其京兆來秋稅宜分作兩等上下各半上等每畝稅一斗下等每畝稅六升其荒田如能佃者宜準今年十月二十九日勅一切每畝稅二升仍委京兆尹及令長一一存撫令知朕意五年三月優詔定京兆府百姓稅夏稅上田畝稅六升下田畝稅四升

秋稅上田畝稅五升下田畝稅三升荒田開佃者畝率
二升八年正月二十五日勅青苗地頭錢天下每畝率

十五文以京師煩劇先加至三十文自今已後宜準諸
州每畝十五文建中元年二月遣黜陟使分行天下其
詔略曰戶無主客以見居為簿人無丁中以貧富為差
行商者在郡縣稅三十之一居人之稅秋夏兩徵之各
有不便者三之餘征賦悉罷而丁額不廢其田畝之稅
率以大歷十四年墾數為準徵夏稅無過六月秋稅無

過十一月違者進退長吏令黜陟使各量風土所宜人
戶多少均之定其賦尚書度支總統焉三年五月淮南
節度使陳少遊請於本道兩稅錢每千增二百因詔他
州悉如之八年四月劍南西川觀察使韋準奏請加稅
什二以增給官吏從之元和十五年八月中書門下奏
伏準今年閏正月十七日勅令百寮議錢貨輕重者今
據羣官揚於陵等議伏請天下兩稅榷鹽酒利等悉以
布帛絲綿任土所產物充稅並不徵見錢則物漸重錢

漸輕農人見免賤賣匹帛者伏以羣臣所議事皆至當
深利公私請商量什度支據諸州府應徵兩稅供上都
及留州留使舊額起元和十六年已後並改配端匹斤
兩之物為稅額如大歷已前租庸課調不計錢令其折
納使人知定制供辦有常仍約元和十五年徵納布帛
等估價其舊納虛估物與依虛估物迴計如舊納實估
物并見錢即於端匹斤兩上量加估價迴計變法在長
其物價價長則永利公私初雖微有加饒法行即當就

實比舊給用固利而不害仍作條件處置編入旨符其

鹽利酒利本以權率計錢有殊兩稅之名不可除去錢

額中有令納見錢者亦請令折納時估匹段上既不專

以錢為稅人得以所產輸官錢貨必均其重輕隴畝自

廣於蠶織便時惠下庶得其宜其土之絲麻或地連邊

塞風俗更異賦入不同亦請商量委所司裁酌隨便宜

處置詔從之太和四年五月劍南西川宣撫使諫議大

夫崔戎奏準詔旨制置西川事條今與郭釗商量兩稅

錢數內三分二分納見錢一分折納匹段每二貫加饒
百姓五百文計一十三萬四千二百四十三貫文依此
曉諭百姓訖經賊州縣準詔三分減放一分計減錢六
萬七千六百二十貫文不經賊處先徵見錢今三分一
分折納雜物計優饒百姓一十三萬貫舊有稅薑芋之
類每畝至七八百徵斂不時今併省稅名盡依諸處為
四限等第先給戶帖餘一切名目勒停高祖即位仍用
隋之五銖錢武德四年七月廢五銖錢行開元通寶錢

徑八分重二銖四絰積十文重一兩一千文重六斤四兩仍置錢監於洛并幽益等州秦王齊王各賜三鑪鑄錢右僕射裴寂賜一鑪敢有盜鑄者身死家口配沒五年五月又於桂州置監議者以新錢輕重大小最為折衷遠近甚便之後盜鑄漸起而所在用錢濫惡顯慶五年九月勅以惡錢轉多令所在官私為市取以五惡錢酬一好錢百姓以惡錢價賤私自藏之以候官禁之弛高宗又令以好錢一文買惡錢兩文弊仍不息至乾封

元年封嶽之後又改造新錢文曰乾封泉寶徑一寸重
二銖六分仍與舊錢並行新錢一文當舊錢之十周年
之後舊錢並廢初開元錢之文給事中歐陽詢制詞及
書時稱其工其字含八分及隸體其詞先上後下次左
後右讀之自上及左迴環讀之其義亦通流俗謂之開
通元寶錢及鑄新錢乃同流俗乾字直上封字在左尋
寤錢文之誤又緣改鑄商賈不通米帛增價乃議却用
舊錢二年正月下詔曰泉布之興其來自久實古今之

要重為公私之寶用年月既深偽濫斯起所以採乾封之號改鑄新錢靜而思之將為未可高祖撥亂反正爰創軌模太宗立極承天無所改作今廢舊造新恐乖先旨其開元通寶宜依舊施行為萬代之法乾封新鑄之錢令所司貯納更不須鑄仍令天下置鑄之處並鑄開元通寶錢既而私鑄更多錢復濫惡高宗嘗臨軒謂侍臣曰錢之為用行之已久公私要便莫甚於斯比為州縣不存檢校私鑄過多如聞荆潭宣衡犯法尤甚遂有

將船棧宿於江中所部官人不能覺察自今嚴加禁斷
所在追納惡錢一二年間使盡當時雖有約勅而姦濫
不息儀鳳四年四月令東都出遠年糙米及粟就市給
糶斗別納惡錢百文其惡錢令少府司農相知即令鑄
破其厚重徑合斤兩者任將行用時米粟漸貴議者以
為鑄錢漸多所以錢賤而物貴於是權停少府監鑄錢
尋而復舊則天長安中又令懸樣於市令百姓依樣用
錢俄又簡擇艱難交易留滯又降勅非鐵錫銅蕩穿穴

者並許行用其有熟銅排斗沙澁厚大者皆不許簡自是盜鑄蜂起濫惡益衆江淮之南盜鑄者或就陂湖巨海深山之中波濤險峻人跡罕到州縣莫能禁約以至神龍先天之際兩京用錢尤濫其郴衡私鑄小錢纔有輪郭及鐵錫五銖之屬亦堪行用乃有買錫鎔銷以錢模夾之斯須則盈千百便費用之開元五年車駕往東都宋璟知政事奏請一切禁斷惡錢六年正月又切斷天下惡錢行三銖四銖錢不堪行用者並銷破覆鑄至

二月又勅曰古者聚萬方之貨設九府之法以通天下
以便生人若輕重得中則利可和義若真偽相雜則官
失其守頃者用錢不論此道深恐貧窶日困姦豪歲滋
所以申明舊章懸設諸樣欲其人安俗阜禁止令行時
江淮錢尤濫惡有官鑪偏鑪稜錢時錢等數色璟乃遣
監察御史蕭隱之充江淮使隱之乃令率戶出錢務加
督責百姓乃以上青錢充惡錢納之其小惡者或沉之
於江湖以免罪戾於是市井不通貨價騰起流聞京師

隱之貶官璟因之罷相乃以張嘉貞知政事嘉貞乃弛其禁人乃安之開元二十二年中書侍郎張九齡初知政事奏請不禁鑄錢玄宗令百官詳議黃門侍郎裴耀卿李林甫河南少尹蕭炅等皆曰錢者通貨有國之權是以歷代禁之以絕姦濫今若一啓此門但恐小人棄農逐利而濫惡更甚於事不便左監門錄事叅軍劉秩上議曰伏奉今月二十一日勅欲不禁鑄錢令百寮詳議可否者夫錢之興其來尚矣將以平輕重而權本末

齊桓得其術而國以霸周景失其道而人用弊考諸載籍國之興衰實繫於是陛下思變古以濟今欲反經以合道而不即改作詢之芻蕘臣雖蠢愚敢不薦其聞見古者以珠玉為上幣黃金為中幣刀布為下幣管仲曰夫三幣握之則非有補於煖也舍之則非有損於飽也先王以守財物以御人事而平天下也是以命之曰衡衡者使物一高一下不得有常故與之在君奪之在君貧之在君富之在君是以人戴君如日月親君如父母

用此術也是為人主之權今之錢即古之下幣也陛下若捨之任人則上無以御下下無以事上其不可一也夫物賤則傷農錢輕則傷賈故善為國者觀物之貴賤錢之輕重夫物重則錢輕錢輕由乎物多多則作法收之使少少則重重則作法布之使輕輕重之本必由乎是柰何而假於人其不可二也夫鑄錢不雜以鉛鐵則無利雜以鉛鐵則惡惡不重禁之不足以懲息且方今塞其私鑄之路人猶冒死以犯之况啓其源而欲人之

從令乎是設陷穽而誘之入其不可三也夫許人鑄錢
無利則人不鑄有利則人去南畝者衆去南畝者衆則
草不墾草不墾又隣於寒餒其不可四也夫人富溢則
不可以賞勸貧餒則不可以威禁法令不行人之不理
皆由貧富之不齊也若許其鑄錢則貧者必不能為臣
恐貧者彌貧而服役於富室富室乘之而益恣昔漢文
之時吳濞諸侯也富埒天子鄧通大夫也財侔王者此
皆鑄錢之所致也必欲許其私鑄是與人利權而捨其

柄其不可五也陛下必以錢重而傷本工費而利寡則

臣願言其失以效愚計夫錢重者由人日滋於前而鑪
不加於舊又公錢重與銅之價頗等故盜鑄者破重錢
以為輕錢錢輕禁寬則行禁嚴則止止則棄矣此錢之
所以少也夫鑄錢用不贍者在乎銅貴銅貴在採用者
衆夫銅以為兵則不如鐵以為器則不如漆禁之無害
陛下何不禁於人禁於人則銅無所用銅益賤則錢之
用給矣夫銅不布下則盜鑄者無因而鑄則公錢不破

人不犯死刑錢又日增末復利矣是一舉而四美兼也
惟陛下熟察之時公卿羣官皆建議以為不便事既不
行但勅郡縣嚴斷惡錢而已至天寶之初兩京用錢稍
好米價豐賤數載之後漸又濫惡府縣不許好者加價
迴博好惡通用富商姦人漸收好錢潛將往江淮之南
每錢貨得私鑄惡者五文假託官錢將入京私用京城
錢日加碎惡鵝眼鐵錫古文緹環之類每貫重不過三
四斤十一載二月下勅曰錢貨之用所以通有無輕重

之權所以禁踰越故周立九府之法漢備三官之制永
言適便必在從宜如聞京師行用之錢頗多濫惡所資
懲革絕其訛謬然安人在於存養化俗期於變通法若
從寬事堪持久宜令所司即出錢三數十萬貫分於兩
市百姓間應交易所用錢不堪久行用者官為換取仍
限一月日內使盡庶單貧無患商旅必通其過限輒違
犯者一事已上並作條件處分是時京城百姓久用惡
錢制下之後頗相驚擾時又令於龍興觀南街開場出

左藏庫內排斗錢許市人博換貧弱者又爭次不得俄
又宣勅除鐵錫銅沙穿穴古文餘並許依舊行用久之
乃定乾元元年七月詔曰錢貨之興其來久矣代有公
革時為重輕周興九府實啟流泉之利漢造五銖亦弘
改鑄之法必令小大兼適母子相權事有益於公私理
宜循於通變但以干戈未息帑藏猶虛卜式獻助軍之
誠弘羊興富國之算靜言立法諒在便人御史中丞第
五琦奏請改錢以一當十別為新鑄不廢舊錢冀實三

官之資用收十倍之利所謂於人不擾從古有經宜聽於諸監別鑄一當十錢又曰乾元重寶其開元通寶著依舊行用所請採鑄捉搦處置即條件聞奏二年三月琦入為相又請更鑄重輪乾元錢一當五十二斤成貫詔可之於是新錢與乾元開元通寶錢三品並行尋而穀價騰貴米斗至七千餓死者相枕於道乃擡舊開元錢以一當十減乾元錢以一當三十緣人厭錢價不定人間擡加價錢為虛錢長安城中競為盜鑄寺觀鐘

及銅象多壞為錢姦人豪族犯禁者不絕京兆尹鄭叔清擒捕之少不容縱數月間榜死者八百餘人人益無聊矣上元元年六月詔曰因時立制頃議新錢且是從權知非經久如聞官鑪之外私鑄頗多吞併小錢踰濫成弊抵罪雖衆禁姦未絕况物價益起人心不安事藉變通期於折衷其重稜五十價錢宜減作三十文行用其開元舊時錢宜一當十文行用其乾元十當錢宜依前行用仍令中京及畿縣內依此處分諸州待進止七

月勅重稜五十價錢先令畿內減至三十價行其天下
諸州並宜準此寶應元年四月改行乾元錢一以當三
乾元重稜小錢亦以一當二重稜大錢一以當三尋又
改行乾元大小錢並以一當一其私鑄重稜大錢不在
行用之限大曆四年正月關內道鑄錢等使戶部侍郎
第五琦上言請於絳州汾陽銅原兩監增置五鑪鑄錢
許之建中元年九月戶部侍郎韓洄上言江淮錢監歲
共鑄錢四萬五千貫輸于京師度工用轉送之費每貫

計錢二千是本倍利也今商州有紅崖冶出銅益多又有洛源監久廢不理請增工鑿山以取銅興洛源錢監置十鑪鑄之歲計出錢七萬二千貫度工用轉送之費貫計錢九百則利浮本也其江淮七監請皆停罷從之貞元九年正月張滂奏諸州府公私諸色鑄造銅器雜物等伏以國家錢少損失多門興販之徒潛將銷鑄錢一千為銅六斤造寫器物則斤直六百餘有利既厚銷鑄遂多江淮之間錢實減耗伏請準從前勅文除鑄錢

外一切禁斷元和三年五月鹽鐵使李巽上言得湖南院申郴州平陽高亭兩縣界有平陽冶及馬跡曲木等古銅坑約二百八十餘井差官檢覆實有銅錫今請於郴州舊桂陽監置鑪兩所採銅鑄錢每日約二十貫計一年鑄成七千貫有益於人從之其年六月詔曰泉貨之法義在通流若錢有所壅貨當益賤故藏錢者得乘人之急居貨者必損已之資今欲著錢令以出滯藏加鼓鑄以資流布使商旅知禁農桑獲安義切救時情非

欲利若革之無漸恐人或相驚應天下商賈先蓄見錢者委所在長吏令收市貨物官中不得輒有程限逼迫商人任其貨易以求便利計周歲之後此法遍行朕當別立新規設蓄錢之禁所以先有告示許有方圓意在他時行法不貸又天下有銀之山必有銅鑛銅者可資於鼓鑄銀者無益於生人權其重輕使務專一其天下自五嶺以北見採銀坑並宜禁斷恐所在坑戶不免失業各委本州府長吏勸課令其採銅助官中鑄作仍委

鹽鐵使條疏聞奏四年閏三月京城時用錢每貫頭除
二十文陌內欠錢及有鉛錫錢等貞元九年三月二十
六日勅陌內欠錢法當禁斷慮因捉搦或亦生姦使人
易從切於不擾自今以後有因交關用欠陌錢者宜但
令本行頭及居停主人牙人等檢察送官如有容隱兼
許賣物領錢人糾告其行頭主人牙人重加科罪府縣
所由祇承人等並不須干擾若非因買賣自將錢於街
衢行者一切勿問其年六月勅五嶺已北所有銀坑依

前任百姓開採禁見錢出嶺六年二月制公私交易十貫錢已上即須兼用匹段委度支鹽鐵使及京兆尹即具作分數條疏聞奏茶商等公私便換見錢並須禁斷其年三月河東節度使王鐸奏請於當管蔚州界加置鑪鑄銅錢廢管內錫錢許之仍令加至五鑪七年五月戶部王紹度支盧坦鹽鐵王播等奏伏以京都時用多重見錢官中支計近日殊少蓋緣比來不許商人便換因茲家有滯藏所以物價轉高錢多不出臣等今商量

伏請許令商人於三司任便換見錢一切依舊禁約伏
以比來諸司諸使等或有便商人錢多留城中逐時收
貯積藏私室無復通流伏請自今已後嚴加禁約從之
八年四月勅以錢重貨輕出內庫錢五十萬貫令兩市
收市布帛每端匹估加十之一十二年正月勅泉貨之
設故有常規將使重輕得宜是資斂散有節必通其變
以利於人今緡帛轉賤公私俱弊宜出見錢五十萬貫
令京兆府揀擇要便處開場依市價交易選清強官吏

切加勾當仍各委本司先作處置條件聞奏必使事堪
經久法可通行又勅近日布帛轉輕見錢漸少皆緣所
在壅塞不得通流宜令京城內自文武官僚不問品秩
高下并公郡縣主中使等下至士庶商旅寺觀坊市所
有私貯見錢并不得過五千貫如有過此許從勅出後
限一月內任將市別物收貯如錢數校多處置未了任
於限內於地界州縣陳狀更請限縱有此色亦不得過
兩箇月若一家內別有宅舍店鋪等所貯錢並須計用

在此數其兄弟本來異居曾經分析者不在此限如限滿後有違犯者白身人等宜付所司決痛杖一頓處死其文武官及公主等並委有司聞奏當重科貶戚屬中使亦具名銜聞奏其贖貯錢不限多少並勒納官數內五分取一分充賞錢止於五千貫此外察獲及有人論告亦重科處分并量給告者時京師里閭區肆所積多方鎮錢王鏐韓弘李惟簡少者不下五十萬貫於是競買第屋以變其錢多者竟里巷傭僦以歸其直而高貨

大賈者多依倚左右軍官錢為名府縣不得窮驗法竟不行十四年六月勅應屬諸軍諸使更有犯時用錢每貫除二十文足陌內欠錢及有鉛錫錢者宜令京兆府枷項收禁牒報本軍本使府司差人就軍及看決二十如情狀難容復有違拒者及令府司聞奏十五年八月中書門下奏伏準羣官所議鑄錢或請收市人間銅物令州郡鑄錢當開元以前未置鹽鐵使亦令州郡勾當鑄造令若兩稅納匹段或慮兼要通用見錢欲令諸道

公私銅器各納所在節度團練防禦經略使便據元勅
給與價直并折兩稅仍令本處軍人鎔鑄其鑄本請以
留州留使年支未用物充所鑄錢便充軍府州縣公用
當處軍人自有糧賜亦校省本所資衆力并收衆銅天
下併功速濟時用待一年後鑄器物盡則停其州府有
出銅鉛可以開鑄處具申有司便令同諸監冶例每年
與本充鑄其收市銅器期限并禁鑄造買賣銅物等待
議定便令有司條疏聞奏其上都鑄錢及收銅器續處

分將欲頒行尚資周慮請令中書門下兩省御史臺并
諸司長官商量重議聞奏從之長慶元年九月勅泉貨
之義所貴通流如聞比來用錢所在除陌不一與其禁
人之必犯未若從俗之所宜交易往來務令可守其內
外公私給用錢從今以後宜每貫一例除墊八十以九
百二十文成貫不得更有加除及陌內欠少太和三年
六月中書門下奏準元和四年閏三月勅應有鉛錫錢
並合納官如有人糾得一錢賞百錢者當時勅條貴在

峻切今詳事實必不可行只如告一錢賞百錢則有人
告一百貫錫錢須賞一萬貫銅錢執此而行事無畔際
今請以鉛錫錢交易者一貫已下以州府常行決脊杖
二十十貫已下決六十徒三年過十貫已上所在集衆
決殺其受鉛錫錢交易者亦準此處分其用鉛錫錢仍
納官其能糾告者每一貫賞五千文不滿貫者準此計
賞累至三百千仍且取當處官錢給付其所犯人罪不
死者徵納家資充填賞錢可之四年十一月勅應私賄

見錢家除合貯數外一萬貫至十萬貫限一周年內處
置畢十萬貫至二十萬貫以下者限二周年處置畢如
有不守期限安然蓄積過本限即任人糾告及所由覺
察其所犯家錢並準元和十二年勅納官據數五分取
一分充賞糾告人賞錢數止於五千貫應犯錢法人色
目決斷科貶並準元和十二年勅處分其所由覺察亦
量賞一半事竟不行五年二月鹽鐵使奏湖南管內諸
州百姓私鑄造到錢伏緣衡道數州連接嶺南山洞深

遂百姓依模監司錢樣競鑄造到脆惡姦錢轉將賤價博易與好錢相和行用其江西鄂岳桂管鑄濫錢並請委本道觀察使條疏禁絕勅旨宜依會昌六年二月勅緣諸道鼓鑄佛像鐘磬等新錢已有次第須令舊錢流布絹帛價稍增文武百寮俸料宜起三月一日並給見錢其一半先給虛估匹段對估價支給勅比緣錢重幣輕生人坐困今加鼓鑄必在流行通變救時莫切於此宜申先甲之令以誠居貨之徒京城及諸道起今年十

月以後公私行用並取新錢其舊錢權停三數年如有
違犯同用鉛錫惡錢例科斷其舊錢並納官事竟不行
開元元年十一月河中尹姜師度以安邑鹽池漸涸師
度開拓疏決水道置為鹽屯公私大收其利其年十一
月五日左拾遺劉彤上表曰臣聞漢孝武為政廐馬三
十萬後宮數萬人外討戎夷內興宮室殫費之甚實百
當今而古費多而貨有餘今用少而財不足何也豈非
古取山澤而今取貧民哉取山澤則公利厚而人歸於

農取貧民則公利薄而人去其業故先王作法也山海有官虞衡有職輕重有術禁發有時一則專農二則饒國濟人盛事也臣實為今疑之夫煮海為鹽採山鑄錢伐木為室豐餘之輩寒而無衣飢而無食傭賃自資者窮苦之流也若能以山海厚利資豐餘之人厚斂重徭免窮苦之子所謂損有餘而益不足帝王之道可不謂然乎臣願陛下詔鹽鐵等官各收其利貿遷於人則不及數年府有餘儲矣然後下寬貸之令蠲窮獨之徭可

以惠羣生可以柔荒服雖戎狄猾夏堯湯水旱無足虞也奉天適變惟在陛下行之上令宰臣議其可否咸以鹽鐵之利甚益國用遂令將作大匠姜師度戶部侍郎強循俱攝御史中丞與諸道按察使檢責海內鹽鐵之課比令使人勾當除此外更無別求在外不細委知如聞稱有侵刻宜令本州刺史上佐一人檢校依令式收稅如有落帳欺沒仍委按察使糾覺奏聞其姜師度除蒲州鹽池以外州自餘處更不須巡檢貞元十六年十

二月史牟奏澤潞鄭等州多是末鹽請禁斷從之元和

五年正月度支奏鄜州邠州涇原諸將士請同當處百

姓例食烏白兩池鹽六年閏十二月度支盧坦奏河中

兩池顆鹽勅文只許於京畿鳳翔陝虢河中澤潞河南

許汝等十五州界內糴貨比來因循兼越興鳳文成等

六州臣移牒勘責得山南西道觀察使報其果閬兩州

鹽本土戶人及巴南諸郡市糴又供當軍士馬尚有懸

欠若兼數州自然闕絕又得興元府詔耆老狀申訴臣

今商量河中鹽請放入六州界糴貨從之十年七月度
支使皇甫鏘奏加峽內四鹽劔南東西川山南西道鹽
侶以利供軍從之十二年鹽鐵使程昇奏應諸州府先
請置茶鹽店收稅伏準今年正月一日赦文其諸州府
因用兵以來或慮有權置職名及擅加科配事非常制
一切禁斷者伏以權稅茶鹽本資財賦贍濟軍鎮蓋是
從權昨兵罷自合便停事久實為重斂其諸道先所置
店及收諸色錢物等雖非擅加且異常制伏請準赦文

勒停從之十四年三月鄆青兗三州各置榷鹽院長慶
元年三月勅河朔初平人希德澤且務寬泰使之獲安
其河北榷鹽法且權停仍令度支與鎮冀魏博等道節
度審察商量如能約計課利錢數分付榷鹽院亦任穩
便自天寶末兵興以來河北鹽法羈縻而已暨元和中
皇甫鏐奏置稅鹽院同江淮兩池權利人苦犯禁戎鎮
亦頻上訴故有是命其月鹽鐵使王播奏揚州白沙兩
處納榷場請依舊為院又奏諸道鹽院糴鹽付商人請

每斗加五十通舊二百文價諸處煎鹽停場置小鋪糶
鹽每斗加二十文通舊一百九十文價又奏應管煎鹽
戶及鹽商并諸鹽院停場官吏所由等前後制勅除兩
稅外不許差役追擾今請更有違越者縣令刺史貶黜
罰俸從之二年五月詔曰兵革初寧亦資權筦閭閻重
困則可蠲除如聞淄青鄆三道往來糶鹽價錢近取七
十萬貫軍資給費優贍有餘自鹽鐵使收管已來軍府
頓絕其利遂使經行陣者有停糧之怨服隴畝者有加

稅之嗟犯鹽禁者困鞭撻之刑理生業者乏蠶醬之具
雖縣官受利而郡府益空俾人獲安寧我因節用其鹽
鐵先於淄青兗鄆等道管內置小鋪糶鹽巡院納榷起
今年五月一日已後一切並停仍各委本道約校比來
節度使自收管充軍府逐急用度及均減管內貧下百
姓兩稅錢數至年終各具糶鹽所得錢并均減兩稅奏
聞安邑解縣兩池舊置榷鹽使仍各別置院官元和三
年七月復以安邑解縣兩池留後為榷鹽使先是兩池

鹽務隸度支其職視諸道巡院貞元十六年史牟以金部郎中主池務恥同諸院遂奏置使額二十一年鹽鐵度支合為一使以杜佑兼領佑以度支既稱使其所管不宜更有使名遂與東渭橋使同奏罷之至是裴均主池務職轉繁劇復有是請太和三年四月勅安邑解縣兩池權課以實錢一百萬貫為定額至大中二年正月勅但取匹段精好不必計舊額錢數及大中年度支奏納權利一百二十一萬五千餘貫女鹽池在解縣朝邑

小池在同州鹵池在京兆府奉先縣並禁斷不榷烏池
在鹽州舊置榷稅使長慶元年三月勅烏池每年糶鹽
收博榷米以一十五萬石為定額溫池大中四年三月
因收復河隴勅令度支收管溫池鹽仍差靈州分巡院
官勾當至六年三月勅令割屬威州置榷稅使緣新制
置未立榷課定額胡落池在豐州界河東供軍使收管
每年採鹽約一萬四千餘石供振武天德兩軍及營田
水運官健自大中四年党項叛擾饋運不通供軍使請

權市河東白池鹽供食其白池屬河東節度使不係度
支初玄宗已前亦有鹽池使景雲四年三月蒲州刺史
充關內鹽池使先天二年九月強循除幽州刺史充鹽
池使此即鹽州池也開元十五年五月兵部尚書蕭嵩
除關內鹽池使此是朔方節度常帶鹽池使也

舊唐書卷四十八

舊唐書卷四十八考證

食貨志上調則隨鄉土所產綾絹純各二丈○新書絹
二匹

有事而加役者旬有五日免其調○新書二十五日

更鑄重輪乾元錢一當五十二斤成貫○新書十二
斤成貫

四年閏三月京城時用錢每貫頭除二十文陌內欠錢
及有鉛錫錢等○沈炳震曰按上文義未完下又接

貞元九年勅應屬闕文

京城及諸道起今年十月以後公私行用並取新錢○
武宗本紀作來年正月

舊唐書卷四十八考證

謹案第五頁後七行每日絹三尺刊本脫絹字據
新書及通考增

第六頁後五行天寶三載刊本載作年據新書改
第七頁前一行一黍之廣為分刊本一黍訛八黍
據唐六典改

第七頁前二行容一千二百為倫二倫為合刊本
兩倫字並訛籥據六典及漢書律厯志改

第七頁前三行十斗為斛刊本十下行大字據六

典及漢書律歷志刪

第九頁前五行宜二十三成丁五十八為老按新書二十三作二十五五十八作五十五與此異第十頁前八行稍殷者準八等戶刊本者訛有據通考改

第十三頁後一行重二銖四象新書及通考象作參按沈括云參乃古之象字蜀部以十參為一銖則參象二字從古通用

第十四頁前四行時稱其工刊本工訛功據通考
改

第二十九頁後四行豐餘之輩刊本豐訛農今改



總校官庶吉士臣侍朝

校對官中書臣馮培

膳錄監生臣魏鎔

欽定四庫全書叢要

史部

舊唐書卷四十九

五十九

詳校官內閣侍讀_臣孫球



欽定四庫全書薈要卷四千九百六十五

史部

舊唐書卷四十九

後晉司空同中書門下平章事劉昫撰

食貨志第二十九

食貨下

武德八年十二月水部郎中姜行本請於隴州開五節堰引水通運許之永徽元年薛大鼎為滄州刺史界內有無棣河隋末填廢大鼎奏開之引魚鹽於海百姓歌

之曰新河得通舟舩利直達滄海魚鹽至昔日徒行今
騁駟美哉薛公德滂被咸亨三年關中飢監察御史王
師順奏請運晉絳州倉粟以贍之上委以運職河渭之
間舟舩相繼會于渭南自師順始之大足元年六月
於東都立德坊南穿新潭安置諸州租船神龍三年滄
州刺史姜師度於薊州之北漲水為溝以備奚契丹之
寇又約舊渠傍海穿漕號為平虜渠以避海難運糧開
元二年河南尹李傑奏汴州東有梁公堰年久堰破江

淮漕運不通發汴鄭丁夫以澹之省功速就公私深以
為利十五年正月令將作大匠范安及檢行鄭州河口
斗門先是洛陽人劉宗器上言請塞汜水舊汴河口於
下流滎澤界開梁公堰置斗門以通淮汴擢拜左衛率
府曹曹至是新漕塞行舟不通貶宗器焉安及遂發河
南府懷鄭汴滑三萬人疏決兼舊河口旬日而畢十八
年宣州刺史裴耀卿上便宜事條曰江南戶口稍廣倉
庫所資惟出租庸更無征防緣水陸遙遠轉運艱辛功

力雖勞倉儲不益竊見每州所送租及庸調等本州正
二月工道至揚州入斗門即逢水淺已有阻礙須留一
月已上至四月已後始渡准入汴多屬汴河乾淺又般
運停留至六七月始至河口即逢黃河水漲不得入河
又須停一兩月待河水小始得上河入洛即漕路乾淺
船艘隘閘般載停滯備極艱辛計從江南至東都停滯
日多得行日少糧食既皆不足欠折因此而生又江南
百姓不習河水皆轉顧河師水手更為損費伏見國家

舊法往代成規擇制便宜以垂長久河口元置武牢倉
江南船不入黃河即於倉內便貯鞏縣置洛口倉從黃
河不入漕洛即於倉內安置爰及河陽倉栢崖倉太原
倉永豐倉渭南倉節級取便例皆如此水通則隨近運
轉不通即且納在倉不滯遠船不憂久耗比於曠年長
運利便一倍有餘今若且置武牢洛口等倉江南船至
河口即却還本州更得其船充運并取所減腳錢更運
江淮變造義倉每年剩得一二百萬石即望數年之外

倉廩轉加其江淮義倉下濕不堪久貯若無船可運三
兩年色變即給貸費散公私無益疏奏不省至二十一
年耀卿為京兆尹京師雨水害稼穀價踊貴玄宗以問
耀卿奏稱昔貞觀永徽之際祿廩未廣每歲轉運不過
二十萬石便足今國用漸廣漕運數倍猶不能支從都
至陝河路艱險既用陸運無由廣致若能兼河漕變陸
為水則所支有餘動盈萬計且江南租船候水始進吳
人不便漕輓由是所在停留日月既淹遂生竊盜臣望

於河口置一倉納江東租米便放船歸從河口即分入
河洛官自雇船載運三門之東置一倉三門既水險即
於河岸開山車運十數里三門之西又置一倉每運至
倉即般下貯納水通即運水細便止自太原倉沂河更
無停留所省鉅萬前漢都關中年月稍久及隋亦在京
師緣河皆有舊倉所以國用常贍上深然其言至二十
二年八月置河陰縣及河陰倉河西栢崖倉三門東集
津倉三門西鹽倉開三門山十八里以避湍險自江淮

而沂鴻溝悉納河陰倉自河陰送納含嘉倉又送納太原倉謂之北運自太原倉浮于渭以實關中上大悅尋以耀卿為黃門侍郎同中書門下平章事充江淮河南轉運都使以鄭州刺史崔希逸河南少尹蕭晁為副凡三年運七百萬石省陸運之傭四十萬貫舊制東都含嘉倉積江淮之米載以大輿而西至于陝三百里率兩斛計傭錢十此耀卿所省之數也明年耀卿拜侍中而蕭晁代焉二十五年運米一百萬石二十九年陝郡太

守李齊物鑿三門山以通運闢三門巔輸巖險之地俾負索引艦昇于安流自齊物始也天寶三載韋堅代蕭炁以漕水作廣運潭於望春之東而藏舟焉是年揚釗以殿中侍御史為水陸運使以代韋堅先是米至京師或砂礫糠粃雜乎其間開元初詔使揚擲而較其虛實揚擲之名自此始也十四載八月詔水陸運宜停一半天寶以來揚國忠王鉷皆兼重使以權天下肅宗初第五琦始以錢穀得見請於江淮分置租庸使市輕貨以

救軍食遂拜監察御史為之使乾元元年加度支郎中

尋兼中丞為鹽鐵使於是大變鹽法就山海井竈收權

其鹽立監院官吏其舊業戶洎浮人欲以鹽為業者免

其雜役隸鹽鐵使常戶自租庸外無橫賦人不益稅而

國用以饒明年琦以戶部侍郎同平章事詔兵部侍郎

呂誣代之寶應元年五月元載以中書侍郎代呂誣是

時淮河阻兵飛輓路絕鹽鐵租賦皆泝漢而上以侍御

史穆寧為河南道轉運租庸鹽鐵使尋加戶部員外遷

鄂州刺史以總東南貢賦是時朝議以寇盜未戢關東
漕運宜有倚辦遂以通州刺史劉晏為戶部侍郎京兆
尹度支鹽鐵轉運使鹽鐵兼漕運自晏始也二年拜吏
部尚書同平章事依前充使晏始以鹽利為漕傭自江
淮至渭橋率十萬斛傭七千緡補綱吏督之不發丁男
不勞郡縣蓋自古未之有也自此歲運米數千萬石自
淮北列置巡院搜擇能吏以主之廣牢盆以來商賈凡
所制置皆自晏始廣德二年正月復以第五琦專判度

支鑄錢鹽鐵事而晏以檢校戶部尚書為河南及江淮
已東轉運使及與河南副元帥計會開決汴河永泰二
年晏為東道轉運常平鑄錢鹽鐵使琦為關內河東劔
南三川轉運常平鑄錢鹽鐵使大厯五年詔停關內河
東三川轉運常平鹽鐵使自此晏與戶部侍郎韓滉分
領關內河東山劔租庸青苗使至十四年天下財賦皆
以晏掌之建中初宰相楊炎用事尤惡劉晏炎乃奪其
權詔曰朕以征稅多門郡邑凋耗聽于羣議思有變更

將致時雍宜遵古制其江淮米準旨轉運入京者及諸
軍糧儲宜令庫部郎中崔河圖權領之今年夏稅以前
諸道財賦多輸京者及鹽鐵財貨委江州刺史包佶權
領之天下錢穀皆歸金部倉部委中書門下簡兩司郎
官準格式條理尋貶晏為忠州刺史晏既罷黜天下錢
穀歸尚書省既而出納無所統乃復置使領之其年三
月以韓洄為戶部侍郎判度支金部郎中杜佑權勾當
江淮水陸運使炎尋殺晏于忠州自兵興已來凶荒相

屬京師米斛萬錢官厨無兼時之食百姓在畿甸者拔
穀授穗以供禁軍洎晏掌國計復江淮轉運之制歲入
米數十萬斛以濟關中代第五琦領鹽務其法益密初
年入錢六十萬季年則十倍其初大厯末通天下之財
而計其所入總一千二百萬貫而鹽利過半李靈耀之
亂河南皆為盜據不奉法制賦稅不上供州縣益減晏
以羨餘相補人不加賦所入仍舊議者稱之其相與商
權財用之術者必一時之選故晏沒後二十年韓洄元

琇裴腆包佶盧貞李衡相繼分掌財賦出晏門下屬吏
在千里外奉教如目前四方水旱及軍府織芥莫不先
知焉其年詔曰天下山澤之利當歸王者宜總權鹽鐵
使三年以包佶為左庶子汴東水陸運鹽鐵租庸使崔
縱為右庶子汴西水陸運鹽鐵租庸使四年度支侍郎
趙贊議常平事竹木茶漆盡稅之茶之有稅肇於此矣
貞元元年元琇以御史大夫為鹽鐵水陸運使其年七
月以尚書右僕射韓滉統之滉歿宰相竇叅代之五年

十二月度支轉運鹽鐵奏比年自揚子運米皆分配緣

路觀察使差長綱發遣運路既遠實謂勞人今請當使

諸院自差綱節級般運以救邊食從之八年詔東南兩

稅財賦自河南江淮嶺南東道至于渭橋以戶部侍郎

張滂主之河東劔南山南西道以戶部尚書度支使班

宏主之今戶部所領三川鹽鐵轉運自此始也其後宏

滂互有短長宰相趙憬陸贄以其事上聞由是遵大厯

故事如劉晏韓滉所分焉九年張滂奏立稅茶法自後

裴延齡專判度支與鹽鐵益殊塗而理矣十年潤州刺

史王緯代之理于朱方數年而李錡代之鹽院津堰改

張侵剝不知紀極私路小堰厚斂行人多自錡始時鹽

鐵轉運有上都留後以副使潘孟陽主之王叔文權傾

朝野亦以鹽鐵副使兼學士為留後順宗即位有司重

奏鹽法以杜佑判鹽鐵轉運使理於揚州元和二年三

月以李巽代之先是李錡判使天下權酷漕運由其操

割專事貢獻牢其寵渥中朝柄事者悉以利積於私室

而國用日耗巽既為鹽鐵使大正其事其堰埭先隸浙西觀察使者悉歸之因循權置者盡罷之增置河陰敖倉置桂陽監鑄平陽銅山為錢又奏江淮南峽內充鄆嶺南鹽法監院去年收鹽價緡錢七百二十七萬比舊法張其估一千七百八十餘萬非實數也今請以其數除煮之外付度支收其數鹽鐵使煮鹽利繫度支自此始也又以程昉為揚子留後四月五日巽卒自摧筦之興惟劉晏得其術而巽次之然初年之利類晏之季

年季年之利則三倍於晏矣舊制每歲運江淮米五十萬斛至河陰留十萬四十萬送渭倉晏歿久不登其數惟巽秉使三載無升斗之闕焉六月以河東節度使李鄴代之五年李鄴為淮南節度使以宣州觀察使盧坦代之六年坦奏每年江淮運米四十萬石到渭橋近日欠闕太半請旋收糴通年貯備從之坦改戶部侍郎以京兆尹王播代之播遂奏元和五年江淮河南嶺南峽中兗鄆等鹽利錢六百九十八萬貫比量改法已前舊

鹽利時價四倍虛估即此錢為一千七百四十餘萬貫
矣請付度支收管從之其年詔曰兩稅之法悉委郡國
初極便人但緣約法之時不定物估今度支鹽鐵泉貨
是司各有分巡置於都會爰命帖職周視四方簡而易
從庶叶權便政有所弊事有所宜皆得舉聞副我憂寄
以揚子鹽鐵留後為江淮已南兩稅使江陵留後為荆
衡漢沔東界彭蠡已南兩稅使度支山南西道分巡院
官充三川兩稅使峽內煎鹽五監先屬鹽鐵使今宜割

屬度支便委山南西道兩稅使兼知糶賣峽內鹽屬度

支自此始也七年王播奏去年鹽利除割峽內鹽收錢

六百八十五萬從實估也又奏商人於戶部度支鹽鐵

三司飛錢謂之便換八年以崔陵為揚子留後淮嶺已

東兩稅使崔祝為江陵留後為荆南已東兩稅使十三

年正月播又奏以軍興之時財用是切頃者劉晏領使

皆自按置租庸至於州縣否臧錢穀利病之物虛實皆

得而如今臣守務在城不得自往請令臣副使程昇出

巡江淮具州府上供錢穀一切勘問從之閏五月异至
江淮得錢一百八十五萬貫以進其年以播守禮部尚
書以衛尉卿程异代之十四年异卒以刑部侍郎柳公
綽代之長慶初王播復代公綽四年王涯以戶部侍郎
代播敬宗初播復以鹽鐵使為揚州節度使文宗即位
入覲以宰相判使其後王涯復判二使表請使茶山之
人移植根本舊有貯積皆使焚棄天下怨之九年涯以
事誅而令狐楚以戶部尚書右僕射主之以是年茶法

大壞奏請付州縣而入其租于戶部人人悅焉開成元年李石以中書侍郎判收茶法復貞元之制也三年以戶部尚書同平章事楊嗣復主之多革前監院之陳事開成三年至大中壬申凡一十五年多任以元臣以集其務崔珙自刑部尚書拜杜悰以淮南節度領之旣而皆踐公台薛元賞李執方盧弘正馬植敬晦五人於九年之中相踵理之植亦自是居相位大中五年二月以戶部侍郎裴休為鹽鐵轉運使明年八月以本官平章

事依前判使始者漕米歲四十萬斛其能至渭倉者十不三四漕吏狡蠹敗溺百端官舟之沉多者歲至七十餘隻緣河姦犯大紊晏法休使寮屬按之委河次縣令董之自江津達渭以四十萬斛之傭計緡二十八萬悉使歸諸漕吏巡院胥吏無得侵牟舉之為法凡十事奏之六年五月又立稅茶之法凡十二條陳奏上大悅詔曰裴休興利除害深見奉公盡可其奏由是三歲漕米至渭濱積一百二十萬斛無升合沉棄焉武德元年九

月四日置社倉其月二十二日詔曰特建農圃本督耕
耘思俾齊民既康且富鍾庾之量糞同水火宜置常平
監官以均天下之貨市肆騰踴則減價而出田穡豐羨
則增糴而收庶使公私俱濟家給人足抑止兼并宣通
擁滯至五年十二月廢常平監官員觀二年四月尚書
左丞戴胄上言曰水旱凶災前聖之所不免國無九年
儲畜禮經之所明誠今喪亂之後戶口凋殘每歲納租
未實倉廩隨時出給纔供當年若有凶災將何賑卹故

隋開皇立制天下之人節級輸粟名為社倉終於文皇
得無饑饉及大業中年國用不足並貸社倉之物以充
官費故至末塗無以支給今請自王公已下爰及衆庶
計所墾田稼穡頃畝至秋熟準其見在苗以理勸課盡
令出粟稻麥之鄉亦同此稅各納所在為立義倉若年
穀不登百姓飢饉當所州縣隨便取給太宗曰旣為百
姓預作儲貯官為舉掌以備凶年非朕所須橫生賦斂
利人之事深是可嘉宜下所司議立條制戶部尚書韓

仲良奏王公已下墾田畝納二升其粟麥粳稻之屬各

依土地貯之州縣以備凶年可之自是天下州縣始置

義倉每有飢饉則開倉賑給以至高宗則天數十年間

義倉不許雜用其後公私窮迫漸貸義倉支用自中宗

神龍之後天下義倉費用向盡高宗永徽二年六月勅

義倉據地收稅實是勞煩宜令率戶出粟上上戶五石

餘各有差六年京東西二市置常平倉明慶二年十二

月京常平倉置常平署官員開元二年九月勅天下諸

州今年稍熟穀價全賤或慮傷農常平之法行之自古
宜令諸州加時價三兩錢糴不得抑歛仍交相付領勿
許懸欠蠶麥時熟穀米必貴即令減價出糴豆穀等堪
貯者熟亦準此以時出入務在利人其常平所須錢物
宜令所司支料奏聞四年五月二十一日詔諸州縣義
倉本備飢年賑給近年已來每三年一度以百姓義倉
糴米遠赴京納仍勒百姓私出脚錢自今已後更不得
義倉變造七年六月勅關內隴右河南河北五道及荆

揚襄夔綿益彭蜀漢劔茂等州並置常平倉其本上州
三千貫中州二千貫下州一千貫十六年十月勅自今
歲普熟穀價至賤必恐傷農加錢收糴以實倉廩縱逢
水旱不慮阻飢公私之間或亦為便宜令所在以常平
本錢及當處物各於時價上量加三錢百姓有糴易者
為收糴事須兩和不得限數配糴訖具所用錢物及所
糴物數申所司仍令上佐一人專勾當天寶六載三月
太府少卿張瑄奏準四載五月并五載三月勅節文至

貴時賤價出糶賤時加價收糶若百姓未辦錢物者任
準開元二十年七月勅量事賒糶至粟麥熟時徵納臣
使司商量且糶舊糶新不同別用其賒糶者至納錢日
若粟麥雜種等時價甚賤恐更迴易艱辛請加價便與
折納廣德二年正月第五琦奏每州常平倉及庫使司
商量置本錢隨當處米物時價賤則加價收糶貴則減
價糶賣建中元年七月勅夫常平者常使穀價如一大
豐不為之減大儉不為之加雖遇災荒人無菜色自今

已後忽米價貴時宜量出官米十萬石麥十萬石每石
量付兩市行人下價糴貨三年九月戶部侍郎趙贊上
言曰伏以舊制置倉儲粟名曰常平軍興已來此事闕
廢或因凶荒流散餓死相食者不可勝紀古者平準之
法使萬室之邑必有萬鍾之藏千室之邑必有千鍾之
藏春以奉耕夏以奉耘雖有大賈富家不得豪奪吾人
者蓋謂能行輕重之法也自陛下登極以來許京城兩
市置常平官糴鹽米雖經頻年少雨米價騰貴此乃即

日明驗實要推而廣之當興軍之時與承平或異事須兼儲布帛以備時須臣今商量請於兩都并江陵東都揚汴蘇洪等州府各置常平輕重本錢上至百萬貫下至數十萬貫隨其所宜量定多少唯置斛斗足段絲麻等候物貴則下價出賣物賤則加價收糴權其輕重以利疲人從之贊於是條奏諸道要都會之所皆置吏閱商人財貨計錢每貫稅二十天下所出竹木茶漆皆十一稅之以充常平本時國用稍廣常賦不足所稅亦隨

時而盡終不能為常平本貞元八年十月勅諸軍鎮和

糴貯備共三十三萬石價之外更量與優饒其粟及麻

據米數準折虛價直委度支以停江淮運腳錢充並支

綾絹純綿勿令折估所糴粟等委本道節度使監軍同

勾當別貯非承特勅不得給用十四年六月詔以米價

稍貴令度支官米十萬石於兩街賤糴其年九月以

歲飢出太倉三十萬石出糴是歲冬河南府穀貴人流

令以含嘉倉粟七萬石出糴十五年二月以久旱歲飢

出太倉粟十八萬石於諸縣賤糶元和元年正月制歲時有豐歉穀價有重輕將備水旱之虞在權聚斂之術應天下州府每年所稅地子數內宜十分取二分均充常平倉及義倉仍各逐穩便收貯以時出糶務在救人賑貸所宜速奏六年二月制如聞京畿之內舊穀已盡宿麥未登宜以常平義倉粟二十四萬石貸借百姓諸道州府有乏少糧種處亦委所在官長用常平義倉米借貸淮南浙西宣歙等道元和二年四月賑貸並且停

徵容至豐年然後填納九年四月詔出太倉粟七十萬石開六場糶之并賑貸外縣百姓至秋熟徵納便於外縣收貯以防旱水旱十二年四月詔出粟二十五萬石分兩街降估出糶其年九月詔諸道應遭水州府河中澤潞河東幽州江陵府等管內及鄭滑滄景易定陳許晉隰蘇襄復台越唐隨鄧等州人戶宜令本州厚加優恤仍各以當處義倉斛斗據所損多少量事賑給十三年正月戶部侍郎孟簡奏天下州府常平義倉等斛斗請

準舊例減估出糶但以石數奏申有司更不收管內州縣得專以利百姓從之長慶四年二月勅出太倉陳粟三十萬石於兩街出糶其年三月制曰義倉之制其來日久近歲所在盜用没入致使小有水旱生人坐委溝壑永言其弊職此之由宜令諸州錄事參軍專主勾當苟為長吏迫制即許驛表上聞考滿之日戶部差官交割如無欠負與減一選如欠少者量加一選欠數過多戶部奏聞節級科處太和四年八月勅今年秋稼似熟

宜於關內七州府及鳳翔府和糶一百萬石大中六年
四月戶部奏諸州府常平義倉斛斗本防水旱賑貸百
姓其有災沴州府地遠申奏往復已至流亡自今已後
諸道遭災早請委所在長吏差清強官審勘如實有水
旱處便任先從貧下不支濟戶給貸從之建中四年六
月戶部侍郎趙贊請置大田天下田計其頃畝官收十
分之一擇其上腴樹桑環之曰公桑自王公至于匹庶
差借其力得穀絲以給國用詔從其說贊熟計之自以

為非便皆寢不下復請行常平稅茶之法又以軍須迫
蹙常平利不時集乃請稅屋間架等除陌錢間架法凡
屋兩架為一間屋有貴賤約價三等上價間出錢二千
中價一千下價五百所由吏秉算執籌入人之廬舍而
計其數衣冠士族或貧無他財獨守故業坐多屋出算
者動數十萬人不勝其苦凡沒一間者杖六十告者賞
錢五十貫取於其家除陌法天下公私給與貨易率一
貫舊算二十益加算為五十給與他物或兩換者約錢

為率算之市牙各給印紙人有買賣隨自署記翌日合
算之有自貿易不用市牙者給其私簿無私簿者投狀
自集其有隱錢百者沒入二千杖六十告者賞十千取
其家資法既行而主人市牙得專其柄率多隱盜公家
所入曾不得半而怨讟之聲囂然滿於天下至興元二
年正月一日赦悉停罷貞元九年正月復稅茶先是諸
道鹽鐵使張滂奏曰伏以去歲水災詔令減稅今之國
用須有供儲伏請於出茶州縣及茶山外商人要路委

所由定三等時估每十稅一充所放兩稅其明年以後
所得稅錢外貯之若諸州遭水旱賦稅不辦以此代之詔
可之仍委滂具處置條奏自此每歲得錢四十萬貫然
稅無虛歲遭水旱處亦未嘗以錢極贍元和七年御史
臺奏伏準太和三年十一月十八日赦文天下除兩稅
外不得妄有科配其擅加雜權率一切宜停令御史臺
嚴加察訪者臣昨因嶺南道擅置竹練場稅法至重害
人頗深伏請起今已後應諸道自太和三年準赦文所

停兩稅外科配雜權率等復却置者仰勅至後十日內具却置事由聞奏仍申臺司每有出使郎官御史便令嚴加察訪苟有此色本判官重加懲責長吏奏聽進止從之九年十二月左僕射令狐楚奏新置權茶使額伏以江淮間數年以來水旱疾疫凋傷頗甚愁歎未平今夏及秋稍校豐稔方須惠恤各使安存昨者忽奏權茶實為蠹政蓋是王涯破滅將至怨怒合歸豈有令百姓移茶樹就官場中裁摘茶葉於官場中造有同兒戲不

近人情方有恩權無敢沮議朝班相顧而失色道路以目而吞聲今宗社降靈姦兇盡戮聖明垂佑黎庶各安微臣伏蒙天恩兼授使務官銜之內猶帶此名俯仰若驚夙宵知愧伏乞特迴聖聽下鑒愚誠速委宰臣除此使額緣國家之用或闕山澤之利有遺許臣條疏續具奏聞諸採造欲及妨廢為虞前月二十一日內殿奏對之次鄭覃與臣同陳論訖伏望聖慈早賜處分一依舊法不用新條惟納權之時須節級加價商人轉臺必校

稍貴即是錢出萬國利歸有司既無害茶商又不攪茶
戶上以彰陛下愛人之德下以竭微臣憂國之心遠近
傳聞必當咸悅詔可之先是鹽鐵使王涯表請使茶山
之人移植根本舊有貯積皆使焚棄天下怨之及是楚
主之故奏罷焉開成二年十二月武寧軍節度使薛元
賞奏泗口稅場應是經過衣冠商客金銀羊馬斛斗見
錢茶鹽綾絹等一物已上並稅今商量其雜稅並請停
絕詔許之大中六年正月鹽鐵轉運使裴休請諸道節

度觀察使置店停上茶商每斤收撮地錢并稅經過商人頗乘法理今請釐革橫稅以通舟船商旅既安課利自厚今又正稅茶商多被私販茶人侵奪其利今請強幹官吏先於出茶山口及廬壽淮南界內布置把捉曉諭招收量加半稅給陳首帖子令其所在公行從此通流更無苛奪所冀招恤窮困下絕姦欺使私販者免犯法之憂正稅者無失利之歎欲尋究根本須舉綱條勅旨依奏其年四月淮南及天平軍節度使并浙西觀察

使皆奏軍用困竭伏乞且賜依舊稅茶勅旨裴休條疏
茶法事極精詳制置之初理須盡一並宜準今年正月
二十六日勅處分建中三年初榷酒天下悉令官釀斛
收直三千米雖賤不得減二千委州縣綜領醕薄私釀
罪有差以京師王者都特免其榷元和六年六月京兆
府奏榷酒錢除出正酒戶外一切隨兩稅青苗據貫均
率從之會昌六年九月勅揚州等八道州府置榷麴并
置官店沽酒代百姓納榷錢并充資助軍用各有權許

限揚州陳許汴州襄州河東五處榷麴浙西浙東鄂岳
三處置官沽酒如聞禁止私酤過於嚴酷一人違犯連
累數家閭里之間不免咨怨宜從今以後如果有人私沽
酒及置私麴者但許罪止一身并所由容縱任據罪處
分鄉井之內如不知情並不得追擾其所犯之人任用
重典兼不得沒入家產

舊唐書卷四十九